



KENYATAAN AKHBAR

UNTUK SIARAN SEGERA

SME Corp. Malaysia Komited Di Dalam Memastikan Agenda PKS Terus Mendapat Perhatian

Kuala Lumpur, 29 Mac 2017 – MITI dan SME Corp. Malaysia terus komited di dalam memastikan agenda tahun 2017 sebagai tahun permulaan perniagaan dan mempromosikan PKS mencapai matlamatnya. Daripada program berbentuk pembangunan holistik sehinggalah kepada inisiatif pendigitalan PKS dan eDagang, Kerajaan akan memastikan yang industri PKS di Malaysia terus berkembang dan status negara berpendapatan tinggi akan dapat dicapai seiring dengan perkembangan serta keperluan semasa industri.

Bersempena dengan Perhimpunan Bulanan MITI dan Agensi yang berlangsung pada hari ini, tiga sesi pertukaran Memorandum Persefahaman (MoU) telah dilaksanakan dan disaksikan oleh YB Dato' Sri Mustapa Mohamed, Menteri Perdagangan Antarabangsa dan Industri (MITI), YB Dato' Seri Ong Ka Chuan, Menteri MITI II serta Pengerusi SME Corp Malaysia, YBhg Tan Sri Ir (Dr) Mohamed Al-Amin Abdul Majid. Pertukaran MoU tersebut melibatkan Program *LGC Ascend 800* yang dilaksanakan dengan kerjasama Majlis Perundingan Melayu (MPM). Pada majlis ini, kerjasama ini dimuktamadkan dengan penyertaan Johor Corporation (JCorp) sebagai syarikat berkaitan Kerajaan (GLC) pertama yang tampil sebagai rakan strategik di dalam program tersebut. Melalui program ini, PKS Bumiputera yang berpotensi akan ditingkatkan keupayaannya untuk menjadi pembekal kontrak kepada GLC atau mendapatkan pelaburan daripada GLC yang dikenalpasti.

Selain itu, satu lagi pertukaran MoU adalah di antara SME Corp. Malaysia dan Microsoft (Malaysia) Sdn. Bhd. yang bertujuan untuk pelaksanaan program "*Microenterprises Digital Transformers Starter Pack*". Melalui program ini,

perusahaan mikro akan dilengkapi dengan satu alat teknologi bagi peningkatan produktiviti dan pengurusan perniagaan yang lebih efisien. Selain itu, perusahaan mikro yang menyertai program ini juga akan diberikan latihan dalam penggunaan pek permulaan ini. Program ini akan dilaksanakan bagi tempoh masa satu tahun dan dijangka akan dapat membantu 700 perusahaan mikro.

SME Corp. Malaysia juga tidak ketinggalan untuk menjalankan tanggungjawab korporatnya melalui satu program CSR yang diusahakan dengan kerjasama Pertubuhan Pusat Pembangunan Ekonomi Wanita Pakistan Malaysia (PAKNITA) dan Persatuan Ibu Bapa dan Anak-Anak Sakit Kanser Malaysia (PIBAIK). Melalui inisiatif CSR ini, Program '*CancerCare – Donate a Pen*' telah dilaksanakan dengan tujuan untuk mengumpul dana bagi pembelian dua mesin radioterapi dan pembinaan 'rumah perlindungan' untuk kanak-kanak dan keluarga pesakit kanser di Malaysia. Pelancaran Program ini telah disempurnakan oleh Duli Yang Maha Mulia Sultanah Pahang, Sultanah Hajjah Kalsom pada 24 Februari yang lalu. Baginda juga telah bermurah hati untuk menyumbangkan 16 koleksi peribadi baginda untuk dibida. "Acara Bidaan Amal Koleksi Peribadi Duli Yang Maha Mulia Sultanah Pahang" ini telah dikendalikan oleh SME Corp. Malaysia dan berjaya mengumpul dana sejumlah RM87,750 bagi tabung *CancerCare*. Daripada jumlah ini RM60,850 telahpun diserahkan kepada PIBAIK.

Turut menyerikan dan menjayakan gimik penutup kepada Perhimpunan Bulanan MITI dan Agensi kali ini adalah Datuk Rosyam Nor di mana beliau hadir untuk mempromosikan drama mini bersiri "Chor dan Chah" terbitan SME Corp. Malaysia dan Suhan Movies yang akan menemui para penonton pada penghujung Mei 2017 di platform media sosial. Drama mini bersiri yang menampilkan Saharul Ridzwan, Ummi Nazeera, Ruhainies, Hafreez Adam, Luqman Hafidz, Kaza dan Haleeda ini bakal menjadi kit panduan usahawan di mana bantuan yang disalurkan oleh Kementerian dan agensi kepada usahawan digarap dan diterjemahkan ke dalam bentuk drama.

Perhimpunan Bulanan MITI dan Agensi ini turut dihadiri YB Datuk Chua Tee Yong, Timbalan Menteri (Perdagangan) MITI, YBhg. Datuk (Dr.) Hafsah Hashim, Ketua Eksekutif SME Corp. Malaysia serta ketua-ketua agensi di bawah MITI.

TAMAT

Untuk maklumat lanjut, sila berhubung dengan En Ahmad Mu'izz Bin. Mohd Yusof di 03-2775 6275 (muizyusof@smecorp.gov.my) atau Cik Amy Sarah Ahmad Fuad di 03-2775 6352 (amysarah@smecorp.gov.my)

PERBADANAN PERUSAHAAN KECIL DAN SEDERHANA MALAYSIA
(SME CORP. MALAYSIA)
Tingkat 6, SME 1, Blok B, Platinum Sentral,
Jalan Stesen Sentral 2
Kuala Lumpur Sentral,
50470 Kuala Lumpur, Malaysia

Telefon : 603-2775 6000 Fax: 603-2775 6001
Alamat sesawang : <http://www.smecorp.gov.my>
E-mel : info@smecorp.gov.my

SME Corp. Malaysia

SME Corp. Malaysia merupakan sebuah Agensi Penyelaras Pusat yang menggubal dasar umum dan strategi PKS serta menyelaras pelaksanaan Program Pembangunan PKS anjuran semua Kementerian dan Agensi yang berkaitan. Ia bertindak sebagai pusat rujukan setempat bagi penyelidikan dan penyebaran data PKS serta sebagai pusat perhubungan untuk maklumat dan menyediakan khidmat nasihat untuk PKS di Malaysia. SME Corp. Malaysia turut memainkan peranan sebagai Sekretariat kepada Majlis Pembangunan PKS Kebangsaan (MPPK) yang dipengerusikan oleh Y.A.B. Perdana Menteri Malaysia.